

UMNO perlu pemimpin barisan ke-2

BA'U PAHAT, Jumaat — UMNO harus menyediakan pemimpin barisan kedua dan ketiga yang boleh diketengahkan pada bila-bila masa jika keadaan memerlukan, demikian kata Timbalan Perdana Menteri, Datuk Musa Hitam di sini petang ini.

Menurut beliau, pemimpin barisan kedua dan ketiga sangat penting kerana para pemimpin di peringkat tertinggi tidak akan hidup dan berkuasa selama-lamanya.

Katanya, nasib seseorang untuk menjadi pemimpin tertinggi bergantung pada ketokohnya sebagai seorang yang mampu memimpin satu kumpulan besar.

Datuk Musa menjelaskan, paras kepimpinan tidak boleh diukur asal usul orang itu atau dari mana mereka bertapak tapi apa yang dapat ia lakukan untuk negara.

"Saya sendiri naik dari barisan ketiga yang kemudian meningkat ke barisan kedua dan seterusnya kepada sekarang.

"Kalau Datuk Sardon Jubir (sekarang Tun Sardon) tidak mengambil saya menjadi setiausaha politiknya, nasib saya barangkali tidak seperti sekarang.

"Bermula dari situlah saya meningkat setapak demi setapak, katanya di majlis kesyukuran kejayaan Barisan Nasional

dalam pilihanraya kecil parlimen Seri Gading baru-baru ini di Parit Raja, dekat sini.

Kekuatan UMNO, tambah beliau bukan berasaskan peribadi seseorang individu tapi berasaskan kenyataan di mana UMNO adalah parti yang realistik dinamis dan progresif.

Bersedia

"Realistik kerana UMNO bergerak mengikut peredaran masa demi untuk kepentingan rakyat.

"Dinamis kerana UMNO tidak pernah berdiam diri malah sentiasa bergerak dalam semua bidang seperti sukan, riadah, sosial, politik dan agama.

"Sementara progresif

pula kerana UMNO sentiasa menuju kedepan demi untuk masyarakat serta mengatur persiapan untuk generasi akan datang agar mereka dapat hidup lebih stabil, mewah dan sempurna," tegasnya.

Mengenai pilihanraya kebangsaan akan datang beliau berkata, Barisan Nasional umumnya dan UMNO khususnya telah bersedia menghadapi.

Datuk Musa yang juga Timbalan Presiden UMNO berkata, hakikat membuktikan bahawa jentera pilihanraya Barisan Nasional Johor adalah yang paling baik kerana setiap pemimpin dan ahli di semua peringkat bersedia memikul tanggungjawab bersama.

Bahan asal dari Arkib
Negara Malaysia